



## বঙ্গভাষা

### মাইকেল মধুসূদন দত্ত



#### কবি-পরিচিতি

১৮২৪ সালের ২৫ জানুয়ারি যশোর জেলার সাগরদাঁড়ি গ্রামে মাইকেল মধুসূদন দত্ত এক ধনী পরিবারে জন্মগ্রহণ করেন। তাঁর পিতা রাজনারায়ণ দত্ত এবং মাতা জাহ্নবী দেবী। মধুসূদনের প্রাথমিক শিক্ষা শুরু হয় সাগরদাঁড়ির গ্রামের পাঠশালায়। ১৮৩৩ সালে তিনি কলকাতার হিন্দু কলেজে সপ্তম শ্রেণিতে ভর্তি হন। এ সময় তিনি ডিরোজিও প্রভাবিত ইয়ং-বেঙ্গল দল দ্বারা বিশেষভাবে প্রভাবিত হন এবং ইংরেজি ভাষায় সাহিত্যচর্চা শুরু করেন। তিনি মাতৃভাষা বাংলার প্রতি অবজ্ঞা ও ইংরেজি ভাষার প্রতি আসক্ত হয়ে পড়েন। ১৮৪৩ সালে তিনি খ্রিষ্টধর্ম গ্রহণ করেন এবং তাঁর নামের প্রথমে যোগ হয় 'মাইকেল'। ধর্মান্তরিত হওয়ায় হিন্দু কলেজ ছেড়ে শিবপুরের বিশপ্‌স কলেজে ভর্তি হন এবং এখানে তিনি গ্রিক, লাতিন ও হিব্রু ভাষা শেখেন। এছাড়াও তিনি সংস্কৃত, ফরাসি, জার্মান ও ইতালীয় ভাষাতেও দক্ষতা অর্জন করেছিলেন। ১৮৬২ সালে মধুসূদন ইংল্যান্ড যান এবং ব্যারিস্টারি পাস (১৮৬৬) করেন। লন্ডন থেকে তিনি ফ্রান্সের ভার্সাই নগরীতে যান ও বেশ কয়েক বছর অবস্থান করেন। এ সময় তিনি চরম অর্থনৈতিক সঙ্কটে পতিত হন। ঈশ্বরচন্দ্র বিদ্যাসাগর এ সময় অর্থ প্রেরণ করে মধুসূদনকে দেনার দায় থেকে মুক্ত করেন ও দেশে ফেরার ব্যবস্থা করেন। কলকাতার উচ্চ আদালতে আইন ব্যবসা করে দারিদ্র্যের যন্ত্রণা থেকে সাময়িক মুক্তি অর্জন করলেও শেষ জীবনে তিনি পুনরায় অর্থনৈতিক দুরবস্থার মধ্যে নিপতিত হন। হাজার বছরের বাংলা কাব্যের প্রথাগত ধারায় মাইকেল মধুসূদন দত্তই প্রথম বন্ধনমুক্তির অগ্রনায়ক। মধ্যযুগের কবিতায় চরণের শেষে অন্তিমিল-সম্পন্ন পয়ার ও ত্রিপদী ছন্দের প্রথা ভেঙে তিনি প্রবর্তন করেন অমিত্রাক্ষর ছন্দ। আধুনিক বাংলা কবিতার অগ্রদূত হিসেবে বাংলা ভাষায় সাহিত্যচর্চা করে রেখে যান অক্ষয় অবদান। বিষয় ভাবনা, জীবনার্থ এবং প্রকাশ-শৈলীর স্বাভাবিক মধুসূদনের রচনা আধুনিকতার শিখরস্পর্শী। মহাকাব্য, সনেট বা চতুর্দশপদী কবিতা, পত্রকাব্য, প্রহসন, ট্র্যাগেডি নাটক ইত্যাদি রূপকল্পবাংলা সাহিত্যে তিনিই প্রথম প্রবর্তন করেন। ১৮৭৩ খ্রিষ্টাব্দের ২৯ জুন কলকাতার আলীপুর জেনারেল হাসপাতালে মাইকেল মধুসূদন দত্ত শেষ নিঃশ্বাস ত্যাগ করেন।

#### তাঁর উল্লেখযোগ্য রচনা :

- কাব্যগ্রন্থ : তিলোত্তমাসম্ভব কাব্য (১৮৬০), মেঘনাদবধ কাব্য (১৮৬১), ব্রজাঙ্গনা কাব্য (১৮৬১), বীরঙ্গনা কাব্য (১৮৬২), চতুর্দশপদী কবিতাবলী (১৮৬৬);
- নাটক : শর্মিষ্ঠা (১৮৫৯), পদ্মাবতী (১৮৬০), কৃষ্ণকুমারী নাটক (১৮৬১);
- প্রহসন : একেই কি বলে সভ্যতা? (১৮৫৯), বুড় সালিকের ঘাড়ে রৌঁ (১৮৫৯);
- গদ্য-কাব্য : হেকটর-বধ (অসমাপ্ত)।

#### ভূমিকা

মাইকেল মধুসূদন দত্ত রচিত 'বঙ্গভাষা' কবিতাটি চতুর্দশপদী কবিতাবলী গ্রন্থ থেকে সংকলিত হয়েছে। কবিতাটি অক্ষরবৃত্ত ছন্দে রচিত। 'বঙ্গভাষা' কবিতাটি বাংলা সাহিত্যের প্রথম সনেট। মাতৃভাষার প্রতি কবির সুগভীর হৃদয়বেগ এই কবিতায় মার্জিত ও পরিশীলিত ভাবে প্রকাশ পেয়েছে। এখানে বাংলা ভাষা ও সাহিত্যের অজস্র ঐশ্বর্য ও সম্ভাবনার কথা ব্যক্ত হয়েছে কবির নিপুণ বর্ণনায়।



## উদ্দেশ্য

মাইকেল মধুসূদন দত্তের ‘বঙ্গভাষা’ সনেটটি পড়ার পর আপনি-

- বাংলা ভাষায় কবির কাব্য রচনার যৌক্তিকতা সম্পর্কে আলোচনা করতে পারবেন;
- ‘বিবিধ রত্নে’ পরিপূর্ণ বাংলা ভাষার ঐশ্বর্য বিশ্লেষণ করতে পারবেন;
- ‘বঙ্গভাষা’ কবিতার কাব্যবৈশিষ্ট্য ব্যাখ্যা করতে পারবেন।



## মূলপাঠ

হে বঙ্গ, ভাঙারে তব বিবিধ রতন;-  
 তা সবে, (অবোধ আমি!) অবহেলা করি,  
 পর-ধন-লোভে মত্ত, করিনু ভ্রমণ  
 পরদেশে, ভিক্ষাবৃত্তি কুক্ষণে আচরি।  
 কাটাইনু বহু দিন সুখ পরিহরি!  
 অনিদ্রায়, অনাহারে, সঁপি কায়, মনঃ,  
 মজিনু বিফল তপে অবরেণ্যে বরি;-  
 কেলিনু শৈবালে, ভুলি কমল-কানন!

স্বপ্নে তব কুললক্ষ্মী কয়ে দিলা পরে,-  
 “ওরে বাছা, মাতৃকোষে রতনের রাজি,  
 এ ভিখারী-দশা তবে কেন তোর আজি?  
 যা ফিরি, অজ্ঞান তুই, যা রে ফিরি ঘরে।”  
 পালিলাম আজ্ঞা সুখে; পাইলাম কালে  
 মাতৃভাষা-রূপ খনি, পূর্ণ মণিজালে॥



## নির্বাচিত শব্দের অর্থ ও টীকা

**অবরেণ্যে-** যা বরণ বা গ্রহণযোগ্য নয় বিদেশি ভাষাকে পরধন হিসেবে দেখেছেন বলেই কবি ‘অবরেণ্যে’ শব্দ প্রয়োগ করেছেন। প্রয়োগটিকে এই অর্থেও হয়ত নেওয়া যেতে পারে- যা বরণ করা বা গ্রহণ করা সাধ্য বা সামর্থ্যের বাইরে। মাইকেল মধুসূদন দত্ত ছিলেন বহুভাষাবিদ বাঙালি। পৃথিবীর বিভিন্ন ভাষার শ্রেষ্ঠ বহু সাহিত্যকর্মের সঙ্গে তাঁর ঘনিষ্ঠ পরিচয় ছিল; কিন্তু মাতৃভাষার চেয়ে বড়ো কিছু হতে পারে না- এই বোধই কবিকে তাঁর নিজের ভাষা-সাহিত্যের কাছে ফিরিয়ে এনেছিল। **অবোধ-** নির্বোধ, কাণ্ডজ্ঞানহীন। **আচরি-** আচরণ করে, অবলম্বন করে। **আজ্ঞা-** আদেশ, নির্দেশ। **এ ভিখারী-দশা-** কবি ভিখারীর মতো বিদেশি সাহিত্যের দুয়ারে হাত পেতেছিলেন। **কমল-কানন-** পদ্মবন। **কালে-** যথাসময়ে, একসময়ে। **কাটাইনু-** কাটলাম। **কায়-** দেহ, শরীর। **কেলিনু-** খেলা করলাম। **কেলিনু শৈবালে, ভুলি কমল-কানন-** কবি বাংলা ভাষাকে পছন্দ এবং ইংরেজি ভাষাকে শ্যাওলার সঙ্গে উপমিত করেছেন। কবির মন্তব্য : বাংলা ভাষা ও সাহিত্যকে উপেক্ষা করে বিদেশি ভাষা ও সাহিত্যের চর্চা করে তিনি ভুল করেছেন এবং তার সাধনা ব্যর্থ হয়েছে। এ যেন পদ্মবনকে উপেক্ষা করে শ্যাওলা নিয়ে খেলা করা। **কুললক্ষ্মী-** মাতৃভাষায় কবিতা রচনার দৈবী প্রেরণাকে কবি মাতৃভাষার অধিষ্ঠাত্রী দেবী হিসেবে কল্পনা করেছেন। **কুক্ষণে-** অশুভ সময়ে, অনভিপ্রেত মুহূর্তে। **তা সবে-** সে সবকে, সেগুলোকে। **পরদেশে-** বিদেশের সাহিত্যক্ষেত্রে, ইউরোপে কবির প্রবাস জীবনের কথা এখানে বলা হয় নি। কারণ সাহিত্য জীবনের শেষে অর্থোপার্জনের আশায় কবি দেশত্যাগ করেছিলেন। **পরধন-লোভে মত্ত-** পরের সম্পদের লোভে অতিমাত্রায় আকৃষ্ট। **পরধন**



বলতে পাশ্চাত্য সাহিত্যকে বুঝিয়েছেন। কবি মধুসূদনের স্বপ্ন ও আকাজক্ষা ছিল ইংরেজি সাহিত্যের কবি হবার। তাই তিনি পাশ্চাত্য সাহিত্যের ভাব-সম্পদ আহরণে মনোনিবেশ করেছিলেন। তাঁর সাহিত্য-সাধনার সূচনা হয়েছিল ইংরেজি সাহিত্য রচনার মাধ্যমে। পরে ভুল বুঝতে পেরে বাংলা সাহিত্যের সাধনায় আত্মনিয়োগ করেন। **পরিহরি**- পরিহার করে, ত্যাগ করে, এখানে বধিগত হয়ে। **পালিলাম**- পালন করলাম, মান্য করলাম। **বরি**- বরণ করে। কবি মধুসূদন তাঁর সাহিত্য-চর্চার শুরুতে পাশ্চাত্য সাহিত্যের সাধনায় ব্রতী হয়েছিলেন। মাদ্রাজে থাকাকালে প্রচণ্ড পরিশ্রম করেন বিভিন্ন ভাষা ও সাহিত্য অধ্যয়নে। মাতৃভাষাকে উপেক্ষা করে ইংরেজি ভাষায় কাব্য রচনা করার জন্যে যে প্রয়াস সে সময়ে তিনি চালিয়েছিলেন তা যে ব্যর্থ প্রয়াস ছিল তা তিনি শেষ পর্যন্ত বুঝতে পারেন। এখানে আক্ষেপের সুরে সে কথাই বলেছেন তিনি। **বিফল তপে**- নিষ্ফল বা ব্যর্থ তপস্যায়। **ভাঙরে তব বিবিধ রতন**- বাংলা ভাষায় রচিত সাহিত্য-ভাঙর বৈচিত্র্যময় ও উৎকর্ষমণ্ডিত সাহিত্য-সম্পদে পরিপূর্ণ। **ভিক্ষাবৃত্তি**- বিদেশি সাহিত্যকে পরধন বিবেচনা করায় তার চর্চাকে তিনি ভিক্ষাবৃত্তির সমতুল্য মনে করেছেন। নিজের সম্পদকে উপেক্ষা করে অন্য ভাষার সম্পদের দ্বারস্থ হওয়ার জন্য অনুশোচনা ও আত্মসমালোচনার বোধ এখানে প্রকাশিত হয়েছে। **মজিনু**- মগ্ন হলাম, বিভোর হলাম, অত্যধিক আসক্ত হলাম। **মনঃ**- মন, অন্তর, অন্তঃকরণ, চিত্ত। **মাতৃকোষে**- মাতৃভাষার ভাঙরে অর্থাৎ বাংলা সাহিত্যে। **যা রে ফিরি ঘরে**- মাতৃভাষার সাহিত্য সৃষ্টির কাজে ব্রতী হও। **মাতৃভাষা রূপ-খনি, পূর্ণ মণিজালে**- মাতৃভাষা ও সাহিত্যের ভাঙর যেন খনির মতো অনন্ত রত্নসম্পদের আকর। খনি থেকে যেমন বিচিত্র রত্নরাজি লাভ করা যায় তেমনি বাংলা ভাষা ও সাহিত্য অজস্র ঐশ্বর্য ও সম্ভাবনায় ভরপুর। বাংলা সাহিত্যের অমূল্য রত্ন বলে যেসব সুকাব্যের কথা কবি তাঁর 'চতুর্দশপদী কবিতাবলী'-তে উল্লেখ করেছেন, সেগুলো হল : কবিকঙ্কণের 'চণ্ডীমঙ্গল', ভারতচন্দ্রের 'অন্নদামঙ্গল', কাশীরাম দাসের 'মহাভারত', কৃত্তিবাসের 'রামায়ণ', কালিদাসের 'মেঘদূত' ও জয়দেবের 'গীতগোবিন্দ'। **রতনের রাজি**- রত্নসমূহ অর্থাৎ বিচিত্র ঐশ্বর্যময় সাহিত্য নিদর্শনগুলো। **শৈবাল**- শ্যাওলা। **সঁপি**- সঁপে, সমর্পণ করে। **স্বপ্নে তব কুললক্ষ্মী করে দিলা পরে**- মাতৃভাষায় সাহিত্যচর্চার মূলে কবি যে গভীর প্রেরণা অনুভব করেছিলেন তাকে কবি বাংলা ভাষার অধিষ্ঠাত্রী দেবীর স্বপ্নাদেশ বলে কল্পনা করেছেন। **হে বঙ্গ**- বঙ্গ বলতে কবি বাংলা ভাষাকেই বুঝিয়েছেন এবং তাকেই সম্বোধন করেছেন।



### সারসংক্ষেপ

স্বদেশের প্রতি, মাতৃভাষার প্রতি কবি মাইকেল মধুসূদন দত্তের গভীর ভালোবাসা ও শ্রদ্ধাবোধ ফুটে উঠেছে এই কবিতার প্রতিটি চরণে। এখানে কবি শুধু তাঁর সুগভীর হৃদয়বেগই প্রকাশ করেননি, সবকিছু ছাপিয়ে ফুটে উঠেছে মাতৃভাষার মহিমা এবং সুগভীর দরদ। স্বদেশ ও স্বভাষাকে অবহেলা করে কবি ভিনদেশি সাহিত্যে খ্যাতি অর্জনের চেষ্টা করেন। তাতে ব্যর্থ হওয়ায় একদা তাঁর মধ্যে শুভবোধ জাগ্রত হয়। তিনি বুঝতে সক্ষম হন মাতৃভাষাকে বাদ দিয়ে বিদেশি-ভাষা চর্চার মাধ্যমে পূর্ণ সফলতা সম্ভব নয়। বরং মাতৃভাষা চর্চার মাধ্যমেই কাঙ্ক্ষিত সফলতা লাভ করা যায়। কবি বিদেশি ভাষাকে পরধন বলে আখ্যায়িত করে সেই ধন লাভ করার চেষ্টাকে ভিক্ষাবৃত্তির সামিল মনে করেছেন। মাতৃভাষা বাংলা বিবিধ রত্নে পরিপূর্ণ। বাংলা ভাষার যে ঐশ্বর্য রয়েছে তা নিয়েই নির্মিত হতে পারে কালজয়ী সাহিত্য। তাই এ কবিতাটিতে কবি মূলত মাতৃভাষা ভুলে গিয়ে অন্য ভাষায় সাহিত্য রচনার ব্যর্থতা এবং মাতৃভাষায় সাহিত্য রচনার পরিতৃষ্ণির কথা বলেছেন। এই কবিতায় কবির ব্যক্তি-জীবনের প্রভাব পড়েছে।



### পাঠোত্তর মূল্যায়ন : বহুনির্বাচনি প্রশ্ন

#### ১. 'সঁপি' শব্দের অর্থ কী?

- ক. অর্পণ করে  
খ. সমর্পণ করে  
গ. বরণযোগ্য  
ঘ. বিবিধ রতন

#### ২. কবি 'কমল-কানন' বলতে বুঝিয়েছেন-

- ক. ফরাসি সাহিত্য  
খ. শ্যাওলাবন  
গ. পদ্মবন  
ঘ. বাংলা সাহিত্য



নিচের উদ্দীপকটি পড়ুন এবং ৩ ও ৪ নং প্রশ্নের উত্তর দিন:

মাগো তোমার কোলে, তোমার বোলে  
কতই শান্তি ভালোবাসা, আ-মরি বাংলা ভাষা।

৩. উদ্দীপকটির ভাব যে চরণে প্রতিফলিত হয়েছে-

ক. পালিলাম আঙ্গা সুখে; পাইলাম কালে  
গ. কত নদী সরোবর, কিবা জল চাতকীর

খ. হে বঙ্গ, ভাঙরে তব বিবিধ রতন  
ঘ. বন্দরে বন্দরে যথা বাণিজ্যের তরী

৪. উদ্দীপক ও 'বঙ্গভাষা' কবিতায় প্রকাশিত হয়েছে-

i. ভাষাপ্রীতি  
ii. বিত্তবাসনা  
iii. প্রকৃতিপ্রীতি

নিচের কোনটি সঠিক?

ক. i  
গ. iii

খ. ii  
ঘ. i ও ii



### চূড়ান্ত মূল্যায়ন

বহুনির্বাচনি প্রশ্ন :

৫. 'সনেট' হচ্ছে কবিতার একটি-

ক. বিশেষ রূপকল্প  
গ. তাত্ত্বিক আলোচনা

খ. আত্মসমালোচনা  
ঘ. বিশেষ চিত্রকল্প

৬. 'বঙ্গভাষা' কবিতায় প্রকাশিত হয়েছে 'মাতৃভাষার'-

i. সৌন্দর্য  
ii. মাদুর্য  
iii. মহিমা

নিচের কোনটি সঠিক?

ক. i  
গ. iii

খ. ii  
ঘ. i, ii ও iii

নিচের উদ্দীপকটি পড়ুন এবং ৭ ও ৮ নং প্রশ্নের উত্তর দিন :

আমার প্রাণের চেয়ে প্রিয় সে- যে মায়ের মুখের ভাষা।

৭. উদ্দীপকের সঙ্গে 'বঙ্গভাষা' কবিতার মিল রয়েছে-

ক. শিল্পরূপে  
গ. চিত্রকল্পে

খ. ভাবে  
ঘ. উৎপ্রেক্ষায়

৮. উদ্দীপক ও 'বঙ্গভাষা' কবিতার তাৎপর্য হচ্ছে-

ক. মাতৃভাষার প্রতি শ্রদ্ধাবোধ  
গ. কবির আত্মসমালোচনা

খ. কবির সাফল্য ও ব্যর্থতা  
ঘ. প্রথাবিরোধী মানসিকতা

সৃজনশীল প্রশ্ন :

আমি বাংলায় ভালোবাসি  
আমি বাংলাকে ভালোবাসি  
আমি তারই হাত ধরে  
সারা পৃথিবীর মানুষের কাছে আসি  
আমি যা কিছু মহান বরণ করেছি



বিনম্র শ্রদ্ধায়  
মেশে তের নদী সাত সাগরের জল  
গঙ্গায় পদ্মায়।

- ক. ‘বঙ্গভাষা’ কবিতাটি কোন ছন্দে রচিত?  
খ. ‘মাতৃকোষে রতনের রাজি’ বলতে কবি কী বুঝিয়েছেন?  
গ. উদ্দীপকের সঙ্গে ‘বঙ্গভাষা’ কবিতার সাদৃশ্য নিরূপণ করুন।  
ঘ. “উদ্দীপকে ‘বঙ্গভাষা’ কবিতার মূলভাব প্রকাশিত হয়েছে।” –মন্তব্যটির যথার্থতা বিচার করুন।

### 🔑 নমুনা উত্তর : সৃজনশীল প্রশ্ন

ক.

‘বঙ্গভাষা’ কবিতাটি অক্ষরবৃত্ত ছন্দে রচিত।

খ.

‘মাতৃকোষে রতনের রাজি’ বলতে কবি বাংলা ভাষার ঐশ্বর্যময় সাহিত্য-নিদর্শনগুলোকে বুঝিয়েছেন। ‘বঙ্গভাষা’ কবিতায় অনুশোচনাদঙ্ক কবি উপলব্ধি করেছেন তাঁর মাতৃভাষার সাহিত্যের সমৃদ্ধি। তাঁর মতে বাংলা সাহিত্যে রচিত কবিকল্পণের ‘চণ্ডীমঙ্গল’, ভারতচন্দ্রের ‘অন্নদামঙ্গল’, কাশীরাম দাসের ‘মহাভারত’, কৃত্তিবাসের ‘রামায়ণ’ ইত্যাদি অমূল্য রত্ন। কবি মধুসূদন বাংলা ভাষার এসব চিরায়ত সাহিত্যকর্মকে ‘মাতৃকোষে রতনের রাজি’ বলে আখ্যায়িত করেছেন।

গ.

‘বঙ্গভাষা’ কবিতায় কবির মাতৃভাষা বাংলার প্রতি অপরিমেয় ভালোবাসা প্রকাশিত হয়েছে, যা উদ্দীপকেও ফুটে উঠেছে। মাইকেল মধুসূদন দত্ত প্রথম জীবনে ইংরেজি ভাষায় সাহিত্যচর্চা করতেন। পরবর্তী সময়ে তিনি বাংলা ভাষায় সাহিত্যচর্চায় মনোনিবেশ করেন। বস্তুত বাংলা ভাষায় সাহিত্যচর্চা করতে গিয়েই তাঁর প্রতিভার পূর্ণ বিকাশ ঘটে। অবশ্য মাতৃভাষায় কাব্যচর্চার পেছনে তাঁর অন্তরে জন্মে থাকা গভীর দেশপ্রেম নিয়ামকের ভূমিকা পালন করেছে। উদ্দীপকের কবিতার চরণগুলোতে দেশপ্রেমের অফুরন্ত নিদর্শন রয়েছে। উদ্দীপকের কবিতায় কবি বাংলা ভাষা ও বাংলাদেশকে ভালোবাসার কথা বলেছেন। দেশপ্রেমের দৃষ্টিকোণ হতে এখানে প্রকৃতিকে উপস্থাপন করা হয়েছে। উদ্দীপকে বলা হয়েছে সব নদীর জল যেমন সাগর সঙ্গমে এসে মিলিত হয় তেমনি বাঙালি জাতি ইতিহাসের ধারাবাহিকতায় বিভিন্ন জাতিগোষ্ঠীর সমন্বয়ে গঠিত হলেও অভিন্ন আত্মার বন্ধনে বিশ্বাসী। এছাড়া উদ্দীপকে বাংলার মানুষের সঙ্গে বিশ্বমানবের সম্পর্কের কথা বলা হয়েছে। অন্যদিকে ‘বঙ্গভাষা’ কবিতায়ও মাইকেল মধুসূদনের হৃদয়ে সঞ্চিত গভীর দেশপ্রেমের বহিঃপ্রকাশ ঘটেছে। কবিতাটিতে কবিহৃদয়ের সত্তা বাংলা ভাষায় আত্মনিবেদনের মধ্য দিয়ে পূর্ণতার আনন্দ লাভ করেছে। তাই বলা যায়, উদ্দীপকের সঙ্গে ‘বঙ্গভাষা’ কবিতার সাদৃশ্য রয়েছে।

ঘ.

উদ্দীপক ও ‘বঙ্গভাষা’ কবিতায় মাতৃভূমি ও মাতৃভাষাপ্রীতির অন্তরালে দেশপ্রেম প্রকাশিত হওয়ায় উভয়ের মূলভাব একই রকম হয়েছে।

‘বঙ্গভাষা’ কবিতাটিতে বাংলা ভাষার মাধুর্য ও এর প্রতি গভীর অনুরাগ পরিলক্ষিত হয়। এতে মাতৃভাষাকে ঘিরে কবির জীবনে যে আত্মোপলব্ধি ঘটেছিল তারও বহিঃপ্রকাশ রয়েছে। এ কবিতায় মূলত মাতৃভাষার প্রতি ভালোবাসা প্রকাশের মধ্য দিয়ে দেশমাতৃকার প্রতিই গভীর মমত্ববোধ ফুটে উঠেছে।

উদ্দীপকে দেশপ্রেমের এক অনিন্দ্য সুন্দর উদাহরণ উপস্থাপন করা হয়েছে। এখানে দেশপ্রেম প্রকাশিত হয়েছে স্বভাষা, স্বদেশ ও স্বজাতির প্রতি অনুরাগের মধ্য দিয়ে। উপরন্তু উদ্দীপকে রয়েছে বিশ্বমানবতার প্রতি অকৃত্রিম মমত্ববোধ। অন্যদিকে ‘বঙ্গভাষা’ কবিতায় দেশপ্রেমের পরিচয় পাওয়া যায় স্বভাষাপ্রীতির অনুষ্ণে। উদ্দীপক ও ‘বঙ্গভাষা’ কবিতাটি বিশ্লেষণ করলে দেখা যায়, উভয় স্থানেই দেশপ্রেম প্রধান হয়ে উঠেছে। অবশ্য উদ্দীপক ও কবিতাটিতে প্রকাশভঙ্গির দিক দিয়ে স্বাতন্ত্র্য রয়েছে।



উদ্দীপকে কবির চেতনায় বাংলা ভাষা ও বাংলাদেশের প্রতি তীব্র অনুরাগ লক্ষ করা যায়। এখানে অভিন্ন বাঙালি জাতিসত্তার পরিচয় তুলে ধরা হয়েছে। এছাড়া বাঙালি জাতিসত্তার সঙ্গে সংযোগ সাধন করা হয়েছে সর্বমানবের। ‘বঙ্গভাষা’ কবিতায়ও মাইকেল মধুসূদন দত্ত উপলব্ধি করেছেন যে, মাতৃভাষায় সাহিত্য সৃষ্টি করা গৌরবের। তাই কবিতায় তিনি মাতৃভাষার বন্দনা করার সঙ্গে সঙ্গে তাঁর স্বদেশপ্রেমকেও তুলে ধরেছেন। কবিতার প্রবহমাণ পটভূমিতে কবি মাতৃভাষার ঐশ্বর্যের প্রতি এক ধরনের আকর্ষণ অনুভব করেছেন। কবিতার এ বিষয়গুলো দেশপ্রেমেরই উদাহরণ, যা উদ্দীপককে স্মরণ করিয়ে দেয়। অতএব, পর্যালোচনা শেষে একথা বলা যায় যে, উদ্দীপকে ‘বঙ্গভাষা’ কবিতার মূলভাব প্রকাশিত হয়েছে।



#### অ্যাসাইনমেন্ট : সৃজনশীল প্রশ্ন : নিজে করুন

দেশী ভাষা বিদ্যা যার মনে ন জুয়ায়।  
নিজ দেশ তেয়াগী কেন বিদেশ ন যায় ॥  
মাতা পিতামহ ক্রমে বঙ্গত বসতি।  
দেশী ভাষা উপদেশ মনে হিত অতি ॥

ক. বাংলা ভাষায় প্রথম সনেট রচনা করেন কে?

খ. ‘পালিলাম আজ্ঞা সুখে’ বলতে কী বোঝায়?

গ. ‘বঙ্গভাষা’ কবিতার কোন চেতনার সঙ্গে উদ্দীপকের মিল রয়েছে? –ব্যাখ্যা করুন।

ঘ. “উদ্দীপক ও ‘বঙ্গভাষা’ কবিতার কবি চেতনার দিক থেকে এক অভিন্ন সত্তা।” –মূল্যায়ন করুন।



#### উত্তরমালা : বহুনির্বাচনি প্রশ্ন

১. খ ২. গ ৩. ক ৪. ক ৫. ক ৬. ঘ ৭. খ ৮. ক